




Gregory Rincon

“Arte desde mi punto di bista”

ORANJESTAD- Gregory Rincon ta un hoben Arubiano di 19 aña cu actualmente ta studiando pa docente di Cultureel Beeldendekunst en Vormgeving (CKV) na ArtEZ Hogeschool voor de kunsten na Hulanda. Den un entrevista cu Bon Dia Aruba e ta conta tocante su amor pa pintamento y kico e lo kier logra como pintor.

Rincon ta experimenta cu diferente tipo di pintamento manera, esun digital, pastel, cu pen, sketching, verf, fotografia etc. Rincon ta comenta cu na Hulanda despues di caba su carera como docente di CKV e por tuma Kunstgeschiedenis. Esey tin di haber mas cu arte en general manera baile, teatro, musica, pintura etc. E por duna les di pintamento so tambe. E ora e ta un pintor, e lo tin un diploma pa esey tambe.

Inspiracion y comienso

Bon Dia Aruba a puntra Rincon tocante kico ta inspira su persona pa cual e la contesta “Mi inspiracion ta mas cu un cos, manera algo cu ta inspira mi pa sigui cu arte ta cu den e mundo di arte no ta importa con loco of diferente no ta y hopi biaha net esey ta wordo mas aprecia, e ta un luga hopi safe unda mi por ta mi mes 100%. Tambe loke ta keep mi going ta mi gana di haci un diferencia pa e mundo pero tambe pa algun individual nan. Mi kier ta un di e tanto hendenan cu ta bay pone e diferente sorto di arte den e posicion unda e mester di ta y pa e stop di ta menosprecia” Segun Rincon, pinta e tabata haci manera tur hende desde chikito pero tumando e mas serio y purba di improvisa su mes dor di critica y loke su mes tabata wak e la cuminsa rond 11 aña, e tempo ey ainda pa hobby y cu 14 aña mas o menos mi a cuminsa tu me mas serio como algo cu e lo kier realmente mehora aden y pa ta un parti di su bida.

Ehemplo den bida

Tambe Bon Dia Aruba a papia cu Rincon tocante hendenan cu tabata ehemplo nan den su bida artistico pa cual e la bisa “ Mi role models ta basta hopi hende pero mi lo haci esey den e secuencia cu e personanan ki a hunga un rol grandi y influencia

mi decisionnan. Mi por bisa tres muhe a hunga un rol hopi grandi den mi bida cu a lanta mi desde chikito cu ta mi mama, Gina Carrion. Mi wela, Greta Carrion y mi tanta, Lisette Carrion cu semper a bisa mi y siña mi pa traha duro pa loke mi kier y pa ta un persona fuerte den bida.

Den di dos klas di scol basico mi tabata tin un docente cu mi tabata pensa cu tabata super briyante, gewoon waw y desde di e tempo ey mi a bisa cu un docente mi ta bay ta un dia pues e ta e prome hende cu a planta e simia ey den mi. Ora mi a bay Colegio Arubano mi tabata haci pinturanan pero como un hobby, nada cu ma pensa ta bay ta un rol Grandi den mi bida te ora mi a cera conoci cu Femke Hooijmaaijers cu tabata mi docente de drama den CKV y mi mentor algun biaha incluyendo mi ultimo aña cu pa mi ta un di dos mama pa mi cu tabata conoci mi miho cu mi tabata conoci mi mes. Den mi di cuatro aña mi a haya Zaira van der Linden, docente di pintura y man di obra den CKV cu a inspira mi pa sigui un direccion den arte y a laga mi cera conoci cu e scol cu awo ki mi ta atendiendo. Y tambe e ultimo dos nan ta mi Tata, Jose Rincon Bravo. E social werkster na Colegio Arubano, Gail, cu a keda yuda mi hopi cu semper acepta mi mes y no cambia mi mes pa haci Otro contento y awo na ArtEZ mi docente di 2D Rinke Nijburg.”

Prome pintura

Bon Dia a puntra Rincon kico tabata e cos cu el a pinta pa prome biaha. El a bisa “ Wel mi ta sigur cu tabata tin hopi cos

chikito cu mi a pinta hopi jong pero esun cu mi ta corda ainda tabata den scol basico. Mi tabata bay Cacique Macuarima si mi ta corda e nomber bon di mi juffrouw di prome klas tabata of bay cu pension of su pia a kibra of algo asina y mi kier a duna algo leuk. Pues mi a pensa mi ta skirbi algo pe y pinta esey riba e parti dilanti pues imagina bo yiu di 6 aña purbando di pinta un hende, e tabata nada cu na e momento cuallier hende lo kere cu ta special. Pa splica un tiki con e tabata ta un circulo pa cara, krul paso su cabey tabata manera cu krul y cortico y bril cu tambe tabata gewoon rondo, mi ta Corda un hende na cas tabata kier a wak e y mi a sinti cu e tabata asina malo cu ma benta afo, awo mi ta pensa lo tabata leuk pa tin esey ainda, wak di unda ma cuminsa”

Talento den actualidad

Actualmente Rincon ta bisa cu e ta mas enfoca riba scol, pero personalmente e kier cuminsa bende su pinturanan cu ta muestra mas comercial riba T-shirt y haci copia di nan. Tambe den su tempo liber e ta tuma pedidonan di hende basta e por keda cu un poco di libertad artistico. Aki 5 aña, Rincon ta splica cu e ta wak su mes bibando su soño nan y cla cu su estudio. “Algun lo bisa cu e ta loco pa pensa asina grandi pero I say reach for the moon, if you miss you’ll land on the stars hunny. Pa sigui mi kier kere cu aki algun aña mi por ta na caminda pa ta un nomber conoci den henter mundo y influencia arte y

persona. Semper mi ta bisa mi kier ta un persona cu hendenan ta admira y por bin cerca pa sinti miho of pa yuda cu cuallier cos” Tambe Rincon ta subraya cu Salvador Dali ta su pintor faborito. “Mi ta considera Dalí mi pintor paso e tabata parti di e manifesto di surrealismo, cu ta mi forma di arte mas faborito, e ta Hopi realistico pero cu nan ta haci manera e mundo di soño, nan ta sigui mas o menos e cosnan di Sigmund Freud si mi no ta hera, el a bisa cu den hende su soño e tres sentimento mas profundo di hende ta sali den su soño, bo por wak ki ta stroba un persona. Y pues e pinturanan ta sali pa mi hopi bunita”

Arte na Aruba

Bon Dia Aruba a puntra Rincon tocante su opinion pa local ta trata arte na Aruba, Rincon a comenta “Arte na Aruba mi ta haya hopi menosprecia. Y mira como algo hopi manera hobby of pa pret. Si un persona kies CKV den nan pakete ta un tendencia pa yama esey “pret pakete” cu ta mira como pa hende floho of cu no kier haci Hopi esfuerso den nan estudio.

Y tambe e unico cu bo ta haya na scol ta CKV, pues e ta hopi limita pa cual bo kier specialisa aden. Pa mi cu e enfoca riba arte mester ta mas grandi, ya cu arte ta influencia den mi opinion hopi grandi den un hende su bida y por yuda hopi den tin un salida pa expresa bo mes.

Na Aruba mi personalmente ta pensa e posibilidad nan ta hopi limita y chikito pa artistanan Arubiano, canto cu baile ta wordo mas aprecia y lo resto menos, pues mi ta haya ta hopi limita pa artistanan cu aworaki ta descubriendo nan mes”

Luga preferi pa pinta

Bon Dia Aruba a puntra Rincon unda ta su luga preferi pa pinta e la “Awo mi luga faborito pa pinta ta den lokaal R 3.04 na ArtEZ, esey ta unda mi ta haya les di 2D na scol. E ta mi luga faborito paso mi ta rondona di hende cu e mesun. Amor pa arte cu mi y unda mi por expresa mi mes y e reaccion cu mi ta haya riba loke mi Traha tambe ta yuda haci e un leuk luga pa pintando y purbando cosnan nobo”

